



Aqqalu C.Jerimiassen
Atassut

UPA 2023/150
30. maj 2023

Tusagassiortut kalaallisut oqaluttunik amigaateqarneq qanoq iliuseqarfigisinnaanerlutigu Oqallisissiatut siunnersuut.

(Inatsisartunut Ilaasortaq Nivi Olsen, Demokraatit)

Pissaanerup pingasoqiusanngorluni aggugaanerani, ilaatigooriarlugu pissaanerit sisamaattut tusagassiuuteqarneq taaneqarsinnaasarpoq.

Tassami tusagassiortup suliassaa pingaarneq tassaammat, kiffaanngissuseqarluni ingerlatsinerup aqqani pituttorsimanani avammut tusarliisarsinnaanissaq.

Takorluuinnarsinnaavarpuummi qanoq avaanngunartigissanersoq, Kina-mitut imaluunniit maani inersuarmi allaat illersorteqartup russit præsidentiata 2014-innilli kingorna isornartorsiuisuminut malersuisalernerqaratut, nunanut naqisimaneqarluta sunniiniutinik taamaallaat peqartuungaluarpat, imaluunniit tusagassiisarneq illuatungeqanngilluinnartumik taamaallaat ingerlanneqarsinnaasuuppat.

Tusagassiortoqarneq isigiinnariaraanni nunatsinni, ajoraluartumik oqallisissiaqartup oqarneratuulli, annertuumik unammillernartumiippoq.

Akissarsiatigut naammaginantumiinnngitsoq taaneqartarpoq, aammattaarlu tamassumap avataatigut qanoq inuiaqatigiinnit naqissuserneqartalernermikkut (nunami inukittunnguamiinnitta malittaanit), qanoq ulluinnarni isigineqalernartarnerat eqqarsaatingalugu tulluussorinangitsumik inissisimatinneqartuarput.

Partiilersorneq allaat maanna ukiuni kingullerni tusagassiisarnikkut inuiaqatigiinnit sakkortuumik uparuartorneqartarpoq, tamannalu ajoraluartumittaaq paasinarumik, suli nunatsinni tusagassiortuunissamat unammillernarnerusumik inissisimatitsilerpoq.

Politikkikkummi ukiuni kingullerni oqarluartaartuarnerup kinguneranissaaq, tusagassiiviit partiinut allaat attuumassuserniarneqartarneratigut inuiaqatigiinnullu kamassap nerliutiguarneqarniartuarnerani tusagassiortuunissaq ukiuni makkunani oqitsuinnaassanngitsoq Atassummiit oqaatigisinnaavarput.

Tusagassiortut kiffaanngissuseqarlutik avammut tusagassiisinnaanerani innarlerneqartuarpoq, tusagassiitillugit “qallunaannguartutut”, illuinnaasiortutut, “kalaaleqatinik malersuisutut” ilami soppassuit oqaatsit atorlugit akerartungaasaqaat, killilersungaananani oqarsinnaatitaanerunngooq aqqani. Killilersungaananani oqarsinnaatitaaneq inoqammut nikanarsaatit atungassiaagunangikkaluarpoq.



Inuiaqatigiilli oqallittarneranni takusareerparput, qinikkanut, namminersortunut, nunami allamiunut tusagassiortunullumi qanoq ajoraluartumik oqaatsitigut nikassanerit akerartuinerillumi annertutigisarnersut.

Tusagassiortullu nunaqqatigut amerleriaateqanngippata, aarleqqutiginnarsinnaavarput ulimaannakkatut Facebook assigisaalu aqqutigalugit illuinnaasiortumik namminneerlutik tusagassiisartooreersut, sunniiniutaanerusunik ingerlatsisuusut “Fake news”-inik taaneqarsinnaasut ajungaajartuinnavinnissaat.

Naalackersuisut kaammattorusunnarput, oqaaserisimasaminnik attassisariaqalersut nunatsinni tusagassiortut pillugit.

Apeqquteqaat allaavigalugu oqallisissiaangaluaq, assut kivisikkusunnanngeqaaq, Atassummiillu neriuppugut, uuma oqallinnerup kingorna naalackersuisoq imminut pisussaaffilerumaartoq, ajornartusiutaasup maanna piaartumik aqqiviginissaanut.

Taamatut Atassummiit oqaaseqarluta, oqallisissiaqartoq qutsavigaarput.